

宋代詔令全集

學術顧問 曾棗莊 劉琳
主編 王智勇 王蓉貴

第十四冊



四川大學出版社

本書出版得到國家古籍整理出版專項經費資助
國家「一一一」工程重點學科建設項目
四川省哲學社會科學「十五」研究項目

宋代詔令全集

主編 王智勇 王蓉貴

第十四冊



四川大學出版社

宋代詔令全集卷八二四

釋道三

加封三茅君誥

崇寧元年四月二十七日 文見典禮·天神地祇山川雜祀

僧道官免試超越職名補額外守闕鑒義之類更不

施行詔

崇寧元年五月四日

僧道官免試超越職名補額外守闕鑒義之類，自今雖奉特旨衝改舊條等指揮，令省子細契勘，具有礙是何條法聞奏，更不施行。《宋會要輯稿》道釋一之一二。

建長生宮詔

崇寧元年七月三日 文見典禮·天神地祇山川雜祀

山川雜祀

賜劉混康敕

崇寧元年七月六日

敕劉混康：自別以來，必守安靜。爾冲和養氣，得其妙道；學術精深，博通奧旨。救危難以積善，觀德業以養高。小大之事，常所訪問。盡規極慮，頗勤忠恪。濟人利物，功莫大焉。近覽所奏，並皆惟允。已差郝隨專董其事，餘地土等亦一一應副，更有所需，依前奏來。崇寧元年七月六日降到。《茅山志》卷三。

許劉混康修建道觀詔

崇寧二年正月己丑

許茅山道士劉混康修建道觀，仍令直奏災福，無得隱匿。《通鑑長編紀事本末》卷一二七。

賜劉混康詔

崇寧二年正月九日

敕劉混康：修真務本，高道有常之士，學業爲心，去執忘貪之德。特守去病之術，普設濟人之方。爾自離闕下，將周歲紀，近覽來奏，喜聞安靜。所乞立木事，已降指揮修建，本觀所要疾速選定日期興工。如逐旋有闕，一一奏來。春氣漸和，自加調適。謹奉天時，以滋妙道。崇寧二年正月九日。《茅山志》卷三。

賜劉混康詔

崇寧二年三月二十一日

敕劉混康：爾自別京師，脩改歲華，完修祠殿，備悉勤勞。近覽奏章，具知安裕。所云殿名，以「天寧萬福」可也，其《清靜經》並依所奏。爾肅恭祀事，達於上境，所見災祥，何不具奏？此者牟麥發生之際，惟藉膏澤之力。迺自春首以來，頗愆時雨，未濟四郊之農，甚慘千箱之望。朕心憂懼，夙夜匪遑。爾當悉心，體予至懷，用斯懇切之誠，精加祈禱之意。以名非高道，豈達清都？餘宜將愛，愈深妙理。山林幽靜，更保真常。崇寧二年三月二十一日。《茅山志》卷三。

賜劉混康詔

崇寧二年五月二十三日

敕劉混康：爾自別京師，屢經歲時，撫宣之意，惟常累遣。

逮於仲夏，畏日永長。想爾山居，清涼高爽，道妙之餘，動止臻常否？修嚴秘宇，構葺必已成就。崇奉至真，付委加於有德。事更有闕典，可縷縷敷陳。如所見災祥，須一一具奏。時正暑炎，宜自保鍊。餘勤道業，體予至懷。崇寧二年五月二十三日。《茅山志》卷三。

賜劉混康葆貞觀妙先生詔

崇寧二年七月庚子（二）

敕劉混康：卿昔寓處都闕，延對禁廷，每陳忠道之誠，開益朕躬之志。虚心采納，豈泯嘉言？賜號越常，用昭褒顯。所有誥一軸，今遞付卿，至可領也。秋氣爽肅，燕居練養之餘，宜加保護。特賜葆真觀妙先生誥。《茅山志》卷三。

答蔡京等請賜天下州軍崇寧寺額詔

崇寧二年九月

依所奏，仍賜敕額。每逢天寧節，鎮州與紫衣、度牒各一道，其餘州軍監各與度牒一道。許令任意修蓋，候了逐旋奏取旨賜經一藏。《宋會要輯稿》禮五之一五。

修蓋崇寧寺觀詔

崇寧二年十月九日

崇寧寺觀並依十方住持，其披剃并紫衣自崇寧二年天寧節爲始。如未有童行，即仰所差主管僧道保明手下童行披剃。崇寧三年以後，即依此施行。所修寺觀不拘州城縣郭及名山福地，除係禁山林并禁地外，如有官地，不以有無拘礙，並許申監司指射撥充詔奏。應有無名額寺觀可以增廣就充，或可移併，並許本州一面施行。或舊係甲乙住持大寺觀，僧道只有三五人可以撥充者，

亦仰申尚書省，許諸色人緣化并州軍壁畫修建，即不得接便搔擾。應修建竹木物料，所在州軍給文憑前去計置，與免緣路收稅。《宋會要輯稿》禮五之一五。

崇寧寺觀依十方住持詔

崇寧二年十月九日

崇寧寺觀，並依十方住持，其披剃并紫衣，自崇寧二年天寧節爲始。如未有童行，即仰所差主管僧道保的手下童行披剃。崇寧三年以後，即依此施行。《宋會要輯稿》道釋一之三八。

崇寧寺行香事詔

崇寧三年正月二十七日

崇寧寺惟得建置祝聖壽道場行香及祈求外，其餘行香，並令就他寺。《宋會要輯稿》禮五之一五。

監司知通詣崇寧觀燒香詔

崇寧三年六月五日

監司所在州，如崇寧觀在城內者，每月旦日許同本州官屬恭詣燒香；及巡按所至州城，非時亦恭詣本觀燒香點檢。不係監司所在州軍，知、通集官屬同詣燒香。《宋會要輯稿》禮五之二二。

禁借出萬壽寺宣賜經等詔

崇寧三年六月十三日

應天下萬壽寺宣賜經及常住什物，不許借出，不得客人賁攜葷酒飲宴。《宋會要輯稿》禮五之一六。

（二）年月日原無，據《通鑑長編紀事本末》卷一二七補。

賜劉混康詔

崇寧三年九月十五日

敕劉混康：自逮京國，屢改歲華，所思一德之可嘉，在我三秋而不忘。近收來奏，喜知寧謐。幸繼先猷，緝熙秘宇。殿成寶籙，慶□□以臻嚴；閣聳崇寧，仰上真之來格。卿素守虛無，超然高尚。齋持秘宇，能順育於炎涼；靜樂茅峰，自安怡於泉石。來奏具悉，已降指揮差御藥蘇珪提舉管勾，應合須索一一申稟，自可奏裁應副，不致有闕也。霜秋屆候，氣律初寒，更臻道妙，言不多及。如見有何災異，一一奏來。前者祈求事，至今未得感應，今次如何也？崇寧三年九月十五日。《茅山志》卷三。

賜劉混康詔

崇寧三年十一月二十三日

敕劉混康：自別京畿，屢更歲籥。棲三茅而浩志，潔一己以全真。寓迹山居，潛心物外。緬想道妙沖靜，植性清夷，順穹壤以養高，脫塵寰而悟理。茲覽來奏，良悉所懷。涉冬而來，動止安否？知中春詣闕，已差使臣張翊津置其行，備委官司一切應副，或尚有闕，詳具奏來。可期覲爾，預積欣悵。方屆隆冬，將迎朔易，更在博施真教，協濟群生。餘加保練之功，用體眷勤之意。姑此書諭，指不多及。崇寧三年十一月二十三日。《茅山志》卷三。

賜劉混康詔

崇寧三年

朕以卿道備德隆，陳誠助國，特頒異號，故顯高仁。若以恤物濟功，未殫嘉稱，誥命宜當祇受，勿復固辭。想宜知悉。《茅山志》

志》卷三。

賜劉混康詔

崇寧四年正月十二日

敕劉混康：省覽來奏，備悉懇誠。隆寒歲暮，喜獲安常。葺構葆真，尚闕緝用，已降指揮，應干官吏責以近限，併力就功。上梁等事，各有司存，何必告成，迺離淵室？及漕運經畫，一一去訖。首春氣暖，當先詣闕，勿為稍稽，以多高慮。佇聽舟楫，來赴闔闈，已差諸司官沿路管勾，在理當然，難為寢罷。體予眷待，宜悉至懷。崇寧四年正月十二日。《茅山志》卷三。

賜劉混康詔

崇寧四年正月二十四日

敕劉混康：存覽來奏，備悉懇情。春首峭寒，喜知寧謐。爾心志通博，絕塵慮以保真常；識達精微，養靈臺而臻妙道。自建三茅，縈爾一心。茲者修完之役，已至丹腹之工。委付有司，必早周備。沖靜是守，毋勞神用。迺眷爾益，欲宣趨對之懷；厥意惟堅，宜遂告成之請。可依所奏，纔候工畢日，速赴闕下。其張翊已降指揮，專一催督應辦去訖，并本命神像遷入法堂，權行奉安。如更有闕，一一奏來。春寒屆候，宜加保毓，用昭優渥，體予至懷。崇寧四年正月二十四日。《茅山志》卷三。

賜劉混康詔

崇寧四年閏二月三日

敕劉混康：覽卿來奏，備悉懇懷。欣富涉春，益聞保福。中前赴色之書，繼有告成之約。以謂君子不可以力致，方士不可以拘縈。載詳爾意，宜遂厥求。俾從達者之逍遙，式副高人之所

請，固非少拒，勿致深疑。況卿洞鑑真元，默垂道蔭。植性衍沖淵之意，稟材多介恪之仁。神符有濟，順天地之生成；法力無窮，贊陰陽之化育。清高可尚，塵俗難羈。浩然守志於林泉，潔素以安於壽考。宮宇修完，應辦可集，已令促役，必無緩時。纔有畢工之奏，速期赴闕之行。未即對問，更希加愛。故茲詔示，想宜知悉。崇寧四年閏二月三日。《茅山志》卷三。

崇寧寺觀鑄闕銅許就場收買詔

崇寧四年五月二十三日

諸路崇寧寺觀鑄闕銅，許給公據前去就場買銅。《宋會要輯稿》禮五之一六。

捨田土頃畝在崇寧寺觀免納役錢詔

崇寧四年五月二十五日

諸路人戶捨田土頃畝在崇寧寺觀，與免納役錢。《宋會要輯稿》禮五之一六。

賜劉混康詔

崇寧四年五月二十九日

敕劉混康：卿宅心道妙，顯迹神功。順四序以凝和，寓一身而永福。靈符法水，久推濟物之仁；保氣存神，自得養生之主。涉此畏景，想集殊禧。比詢入觀之期，力有告成之請。畢工在邇，重諾難渝。宜促行裝，正風帆，可乘之便，早登畫鷁。當江水善利之時，暑炎在候，更切保頤。故茲書示，言不多及。崇寧四年五月二十九日。《茅山志》卷三。

賜劉混康詔

崇寧四年六月十七日

敕劉混康：省觀來奏，備悉所懷。涉夏之中，提身益福。歷知工築，僅及於告成；將伺舟維，屆臨於近甸。其如服勤職事，幹集善能，顧惟激勵之風，當允誠忱之請。指期良觀，促日戒行。敷善利於群生，享微名於大道。副茲至禮，體我眷懷。夏熱，卿比平安好？遣書指不多及。崇寧四年六月十七日。《茅山志》卷三。

賜劉混康詔

崇寧四年七月十八日

敕劉混康：卿法大道之自然，稽真詮之典則。順時樂性，正一己之貞心；闡教濟人，保千齡之上壽。睽闕滋久，懷想良多。累召待來，逮今改歲，尚有力難之奏，猶塵固避之言。況予疊命有司，當遂責成，董集其工，但勿貽慮。餘者完繕，悉付規模，漸可慶全，夫何多遜？宜速登舟之備，佇聆飛櫓之音。仙帆風靜，秋水波平，乘茲清景，勿辭來對。荐頒詔諭，示我眷隆。將遂觀言，遣書指不多及。崇寧四年七月十八日。《茅山志》卷三。

賜劉混康詔

崇寧四年八月二十日

敕劉混康：自遠皇都，屢周星歲。居名山而崇秘殿，竭丹懇以奉高真。闡揚大道之源，昭答上靈之貺。葺興觀宇，廣集休祥。壯一代之弘規，衍萬年之景祚。凡所陳述，皆盡公忠。顯須來對，從便船居，其如退材，已行處分。畢役云初，慶成就緒。

當斯秋景，促棹安流。天高雲靜，蘸晴光千里之平波；水翠煙溟，蕩素色一帆之輕吹。尚測氣力，自養清高。故此詔示，宜悉眷懷。非晚觀言，茲惟簡及。崇寧四年八月二十日。《茅山志》卷三。

賜劉混康詔

崇寧四年九月十二日

敕劉混康：省所奏，修造已就緒，欲於九月中乘船赴闕朝謝者。欣聆畫鷁，容與秦淮，顒伺仙舄，翱翔魏闕。佇聽希夷之妙誨，欽敷慈儉之淳風。治念烹鮮，動趨正道。霜秋屆候，涉履良勤。爰命使華，往加撫勞。體茲眷異，益固冲和。宜速進舟，慰予跂望。秋冷，卿比平安好？遣書指不多及。崇寧四年九月十二日。《茅山志》卷三。

朝拜崇寧萬壽觀儀制詔

崇寧五年四月七日

諸崇寧萬壽觀朝拜，並乘馬於殿門外上下，帶入殿，人從不得過三名，入《元符儀制令》。《宋會要輯稿》禮五之一三。

賜劉混康詔

崇寧五年

敕劉混康：心存道要，夙契真元。久處逍遙之場，自得冲和之旨。昨迂芝蓋，來叩楓宸。遂款秘奧之名言，乞還茅峰之舊隱。志堅意切，勉從所陳。違遠以來，倏爾經月，每一思念，寤寐不忘。扁舟高卧，諒及淮楚之畿；三秀棲真，獲出塵寰之表。高風遐舉，良景慕之。時當祥暑，卿比平安好？遣書指不多及。

《茅山志》卷三。

賜劉混康詔

崇寧五年五月十三日

先生自離闕下，倏忽閱月。想以道妙，動止冲和，每一南望，愈增戀慕。向者所託奏章之事，伺有天意，可速奏來，及求傷風符子數十道，附遞封進。時方炎暑，清虛自重。想已到宮，所修如何？潛神庵了與未？一一奏來。崇寧五年五月十三日。《茅山志》卷三。

賜劉混康詔

崇寧五年六月二十日

敕劉混康：所奏拜章事具知。夫至誠必通，精修有感，事具存於奧典，儀昭著於真科。卿虔心請禱，齋潔馳神，默契高真，獲通秘旨。非夫公忠之內充，何得精誠而上達？郵音忽至，嘉歎良深！昨懇辭上京，丐還舊里。三茅勝槩，允資高尚之居；列聖所棲，克叶潛神之志。更宜保練，以副虛懷。畏暑在序，卿比平安好？遣書指不多及。崇寧五年六月二十日。《茅山志》卷三。

賜劉混康詔

崇寧五年六月二十日

先生離闕下來，又復累月，比日炎暑，想以道妙清勝。所奏祥章，不勝嘉歎。自非先生高道洞達，何以臻此？如更有所見，附黃希叟來奏，得無隱，幸也。本宮所闕，亦可一一縷細開陳。潛神之役，未見告功，不知所修可意否？《茅山志》卷三。

賜劉混康詔

崇寧五年七月四日

所奏事逐一降指揮訖，如更有所闕，但一一見示提舉官。已

差楊戩題額，已書，知之。蔡卞亦已撰文。先生自來贛直，有所聞見災福，但詳細密奏。花木已收，瑞香尤佳。傅希列回，付詔書等及賜祠部，餘各賜紫衣、師號。親書畫扇，暑熱，可以召風鎮心。符子告求數帖。傅希列等回，附物下項：沉、檀、箋香各二十斤，生熟龍腦五斤，降真香十斤，四味果子二十觔，御書畫扇頭十箇，香藥二分。崇寧五年七月初四日。《茅山志》卷三。

賜劉混康詔

崇寧五年七月二十日

敕劉混康：卿夙臻要妙，志尚清虛。朕遐想高風，無忘朝夕。載披貢牘之勤心，益表公忠於王室。言念及斯，良深嘉歎！所陳情悃，並即施行。永勝先塋，許焚修之徒衆；潛神官屬，第推賞於階資。成命已頒，可悉亮也。朕欽崇大道，景仰露蹤，是述志以昭功，故開山而建宇。畢工來上，欣懌交懷。所期大闡真風，錫蕃禧於黎庶；精治法錄，永協贊於丕基。諄誨尚遙，冲襟善護。秋涼，卿比平安好？遣書指不多及。崇寧五年七月二十日。《茅山志》卷三。

賜劉混康詔

崇寧五年八月二十日

先生養素金壇，策名紫府，昨自仙舟東下，日深懷想。邇來秋氣頓清，緬惟道體和裕。未涯訪道，惟切傾思。保練潛神，副予瞻矚。其碑額等今已書畢，遣人降賜。餘有所陳，俱具奏章。

崇寧五年八月二十日。《茅山志》卷三。

賜劉混康詔

崇寧五年八月

敕劉混康：棲真有素，守道無渝，功行益隆，聲華夙著。即萬寧之燕處，奉大籙以精勤。博濟群生，咸趨善化。擴爾無爲之妙，相予可致之祥。蓋名以實彰，禮緣德稱。宜錫褒嘉之寵，用延弘遠之休。法號增崇，僉言惟允。往即欽承，毋或遜避。所有誥命今附遞賜，至可領也。時當素秋，卿比平安好？遣書指不多及。《茅山志》卷三。

賜劉混康詔

崇寧五年八月

朕以先生棲真句曲，養素潛神，符水施功，慈濟遠邇。嘗招鶴馭，論道宣和，啓迪無爲，輔成靜治。欽承微妙，寤寐不忘。近以宮宇告成，特加先生冲和二字，其誥已入遞附賜，當體着遇，時貢至言。造闕未涯，尤希保裔。《茅山志》卷三。

賜劉混康詔

崇寧五年八月

宣師所奏宮門牆宇等事乞修治，已令有司火急應副物料、材木等，責立近限速令畢集，無致逗遛稽緩去訖。如先生更有所闕，但具奏無隱也。傷風符鎮心壓驚，佩帶符子，各求數十道，幸甚。《茅山志》卷三。

釋徒營佛事以天帝爲鬼神令有司削除詔 崇寧五年十月壬戌〔一〕

有天下者尊事上帝，敕命惟幾，敢有弗虔？而釋氏之徒修營佛事，妄以天帝次於鬼神之列。瀆神踰分，莫此之甚，其能克享上帝之心乎！可令有司檢會削除，以稱朕嚴恭寅畏之意。《茅山志》卷三。

賜劉混康詔 崇寧五年十月十二日

敕劉混康：省累上表，具悉。卿道高二許，德貫三茅。爲教法之宗師，擴真風而濟物。懇辭輦轂，裕處名山。闊清標之晤會，思綺幌之奧言。每覲貢章，良嘉勤意。所陳乞事皆已施行。徒弟師名，錫凝和之美號；豐碑刊勒，許漕幕之總提。今者方外又寧，雨暘時若，荷上帝之降康，亦焚修之有助。霜秋屆候，良晤未期，勉加保頤，用慰傾想。宜淨之敕，今同遞附，至可領也。卿比平安好？遣書指不多及。崇寧五年十月十二日。《茅山志》卷三。

賜劉混康詔 崇寧五年十月

睽阻以來，復見窮秋。引領南顧，徒切坐馳。每得郵音，大慰傾渴。山林虛靜，想神游沖漠，以適安耳。所賜《還山詩》、《慶成頌》，並許刊模，自餘手詔等不可上石。乍冷，保持法錄外，倍萬珍齋。《茅山志》卷三。

賜劉混康詔 崇寧五年十月二十四日

敕劉混康：所進《天寧節功德疏》具悉。卿養浩山樊，棲真方外，忠惟體國，志在愛君。屬厥月之誕彌，被清場而薦祉。疏言來上，嘉歎良深！故茲詔示，想宜知悉。冬寒，卿比平安好？遣書指不多及。崇寧五年十月二十四日。《茅山志》卷三。

賜劉混康詔 崇寧五年十二月十八日

敕劉混康：省所上表，「本宮開建慶成道場有仙燈現」事，具悉。卿心游蓬島，坐揖崆峒。守修真抱一之奧，洞歸根復命之源。是以慶成寶齋，仙燈示瑞。蓋精衷之上達，由至誠之內充，嘉祥荐臻，靈貺昭答。含生均被，美利難云。省覽以還，良深歎獎！兼聞仲冬擇日親詣永勝焚黃，時當沍寒，不無勞動。計想鶴馭今已還山，俯邇迎長，生經善衛。崇寧五年十二月十八日。《茅山志》卷三。

賜劉混康詔 崇寧五年十二月十八日

睽異以來，俄經冬序。每思清誼，時唯引領。知道場有聖燈現於飄輪峰，誠爲奇異。自非先生精誠昭格，孰能臻此？伏紙增歎，未期胥見，尤積倡企。唯加自頤，良副所望也。聞先生往常焚黃，時當凝凜，道途保愛，歸庵日，符子更求數十道。同前。

〔一〕年月日據《東都事略》卷一〇補。《茅山志》卷三所載係大觀元年二月錄賜茅山道士劉混康者。

《茅山志》卷三。

賜劉混康詔

崇寧五年

敕劉混康：徒弟傅希列齋到表章具知。刻意虛無，宅心清靜，得無爲之妙理，通大道之淵源。自抵萬寧，矧多餘裕。三茅紫府，列聖福庭，真仙所棲，靈答如響。卿寶金籙而練氣，秘玉簡以清修，想得優游，必資香火。上祈宗社之謐寧，下濟黎元於仁壽。所馳至意，宜亮悉之。徒衆忽臨，封章來上，深嘉遠懇，益表勤誠。驟爾睽違，但渴名理。溽暑尚熾，善衛是宜。卿比平安好？遺書指不多及。《茅山志》卷三。

賜劉混康詔

崇寧五年

傅希列等齋到表章，知卿已至元符萬寧宮，及知拜章事。蒙上天慈恤，敷錫嘉祥。卿道慕三茅，行遵二許。暫來魏闕，還駐故山。鶴馭難留，每深引嚮。近煩慈念，通拜寶章。祇荷蒼旻，俯垂淵鑑。丁寧天訓，警悟不忘。夙夜欽崇，以酬昭貺。炎暑方隆，保愛是宜。餘具詔意。《茅山志》卷三。

賜劉混康詔

崇寧五年

敕劉混康：省所上表，乞差官撰述宮記事具悉。茅嶺幽棲，積金舊址。眷念靈迹，旁連洞宮。敞瑤臺之新府，大啓煥於真風。宮宇落成，豐碑可俟。命碩儒以製文，及親題於碑額。非特爲一時之盛事，抑以彰前人之休聲。卿當慎擇高流，同勤至道，精修不懈，迺情所瞻。每思心要，常憶儀刑。顧川塗之脩阻，想

會晤之尤賒。其親書碑額及蔡卞所撰書記，今差使臣管押前去，至可領也。秋涼，卿比平安好？遺書指不多及。《茅山志》卷三。

賜劉混康詔

崇寧五年

敕劉混康：奉教玄元，宅心清靜，造洞真之奧，隱茅峰之顛。迺瞻舊居，緬然靈異；構崇新宇，大壯宗風。丹臺鮮麗，演崆峒之道樞；紫府鼎新，追汗漫之高躅。按圖顯敞，寔稱真游。益彰崇奉之勤，用慶落成之美。益增欣沃，當形詠歌。御製《慶成頌》一軸，今人遞賜，至可領也。高秋氣肅，比平安好？遺書指不多及。《茅山志》卷三。

賜劉混康詔

崇寧五年

初夏之別，幾半載矣，坐阻顏角，迺情悵想。每引領之動思，阻修途而興歎。還山以來，景仰何啻？有詩寫懷，今同附遞到，並檢領。極思晤語，邈未有期。金風向勁，天和善保。符子已收，更求佩帶符數道。推恩事已施行，希知之。《茅山志》卷三。

賜劉混康詔

崇寧五年

敕劉混康：省所上表陳乞事，具悉。卿潛心淵靜，造道粹全。涉茲冬律，克保天倪。荐覽貢囊，備悉來懇。蓋事功之就緒，寔推賞之未周。敷陳是宜，銓次匪濫。並可其奏，已即施行。宣義營田，特從本宮之所請；丹陽塘瀾，不許他司之占留。事悉緣公，物無私己。載披勤至，用歎忠嘉。宜樂真常之餘，擴

推上清之法，相予福祉，永庇寰區。更在精衷，明體朕意。初寒，卿比平安好？遣書指不多及。《茅山志》卷三。

賜劉混康詔

崇寧五年

睽異以來，日月如馳，景仰何及。偃蹇白雲，想多佳致。近陳乞所賜詩頌上石，並自刊模頒降次真本，一一自收。別有陳請，附遞奏來。胥會未期，引向彌深。冬序漸寒，爲道保育。《茅山志》卷三。

賜劉混康詔

大觀元年正月二十七日

敕劉混康：克持真教，慎保天倪。棲巖穴以逍遙，奉法錄而寧燕。顧其淵懿，宜有褒崇。既頒諭於詩篇，復形容於善頌。抗章來上，刊石是期。嘉爾丹誠，勒於翠琰，已令丹御，真彼宮垣。傳弟子而彰不泯，昭眷禮而示無窮。當體朕心，益崇法訓。臘殘春及，氣易序遷，更勤保練之功，頻示沖虛之訣。已差使臣專一管押刻石前去，至可領也。凝寒，卿比平安好？遣書指不多及。大觀元年正月二十七日。《茅山志》卷三。

道士女冠序位在僧尼上御批

大觀元年二月己未

道士序位，令在僧上，女冠在尼上。《通鑑長編紀事本末》卷一
二七。

賜劉混康詔

大觀元年二月九日

敕劉混康：卿秉心無妄，執道不回。總持法源，群生所賴。

功庸昭著，揭如日星。使上清之教益隆而弗替者，寔有力焉。比以道、釋混淆，理宜區別，斷自朕心，重訂訛謬。至如三清混居於水陸，元命反祠於梵宮，繪塑無倫，不可概舉。朕方圖叙彝倫，講明教法，稽考後先之理，推原積習之端，申飭有司，分別崇奉。庶蒙休祉，溥祐含生。諒在淵沖，必惟允議。更新歲律，尚冀保綏。故茲示諭，想宜知悉。寒沍，卿比平安好？遣書指不多及。大觀元年二月九日。《茅山志》卷三。

賜劉混康詔

大觀元年二月十五日

敕劉混康：提身沖粹，有道淵深，秉志不回，推心篤善。省觀奏牘，備悉至懷。仍聞新歲以來，法履泰定。所進鸞煎靈方、夙授仙餌今存，雖神鼎金丹之妙，無以加諸。長生之理，茲其大致乎。披繹勤志，忻愜於中。妙術恭持，必無畔戾。時傳郵命，副以好音。春序云初，天和善護。睽異晤言，俄經新律，渴想儀刑，朝夕弗替。近降敕書，所論道、釋混淆，已付外施行，事恐未詳盡，今錄元降全文，付卿一看。卿教門綱領，人所視效。其諸傳授，保執持之，無吝忽也。所修石橋道路事，已委發運使曾孝蘊專一應副施行。益遠會見，千萬加慎。鎮心神符子告求數十道，恐有所見災福，告先生示及。筮師初春可令至。昨降物往彼道場，已到否？《茅山志》卷三。

賜劉混康詔

大觀元年二月

敕劉混康：朕祗奉三元，欽崇至道。每念靈承之重，庶臻可致之祥。凡在幅員，率興觀宇。瞻三茅之名封，集殊方之勝

概，倚毗師法，以召蕃釐。卿夙資淵妙之功，屢獲嘉休之應。累迂鶴馭，來叩楓宸。款名理之至言，詢心法之要妙。保神清靜，闡闡厭聞。旅寓儲祥，殆非宜稱。已令董治□□，鳩工構宇。即上清之東隅，建萬寧之別觀，庶專靜館，延處雲輶。可預擇徒弟來此住持。故茲示諭，想宜知悉。《茅山志》卷三。

賜劉混康詔

大觀元年二月十九日

領所奏道教未便泊陳乞事。卿道門宗師，教法綱領，凡所陳請，皆合朕志。睽違高論，日馳南顧。遐想香火之餘，高棲雲表，保神練氣，所得多矣。笱師淨之候黃冕到山，可同赴闕。春序將暄，爲道加慎。大觀元年二月十九日。《茅山志》卷三。

賜劉混康詔

大觀元年四月七日

相別周歲，引領尤勤。兩披奏牘，以疾力辭赴闕。已具別敕，可其所請，宜亮悉之。安處潛神，以保壽康，想綽有餘裕也。道場事前已報知，笱師陳請皆契勘施行。候指揮到，止可令笱師赴闕。會晤尚賒，對時自衛。治百病傷風符子，告求數十道。夜分燈下發，慮先生意不安故也。大觀元年四月七日。《茅山志》卷三。

宋代詔令全集卷八二五

釋道四

賜劉混康詔

大觀元年七月二十九日

宣師至，所奏事一一備曉。謹齋沐寫成密詞一通，託先生拜章奏達，即幸也。伺得天語，速具奏來，餘面諭宣師，令於先生處開陳。貴妃表一通，亦附於宣師回山。御筆畫元始天尊、太上道君各一本，可與去歲所畫太上老君共三清潛神供養。《北斗》等經五冊、扇頭二十箇、果實一十件、香華龍腦茶燭等，各以數交割付宣師。空名祠部五十道、紫衣三十道，恐要度徒弟。宣師之下，應徒弟賜以紫衣師號，隨行侍者十五人皆賜披度，及賜束帛有差。大觀元年七月二十九日。《茅山志》卷四。

建蜀州寅威觀詔

大觀元年八月七日

蜀州民程遵家墳地有火光紫氣之祥，令速行遷葬，可爲奉真祈福之所。宜以其地創建爲寅威觀，降度牒二百道，令轉運司選官營繕。給常平司良田十頃，歲遇天寧節，許度童行二人，賜紫衣一名。《宋會要輯稿》禮五之一四。

賜劉混康詔

大觀元年九月五日

久阻德標，唯勤引嚮。累收郵中之奏，聞安處潛神，綽有餘裕。淨之所奏，各契勘施行。來春赴闕，別敕已諭，此不多述。

當乘春水扁舟西上，毋固抑朕意也。秋秒霜清，保籙持教外，善衛爲最。大觀元年九月五日。《茅山志》卷四。

建顯烈觀御筆

大觀元年九月十日

藝祖皇帝啓運創業，應天順人，踐祚之初，寔自陳橋。方策具載，粲然可考。其地今爲傳舍，往來蹈履，非所以稱朕顯揚祖烈之意。可以其地建立道觀，賜以名額，仍賜「顯烈觀」爲額。所有驛舍，仍移於側近係官地，先次拆移修建，疾速施行。《宋大詔令集》卷一七九。

賜劉混康詔

大觀元年十月十四日

敕劉混康：省所上表，進奉《天寧節功德疏》具悉。孟冬正候，誕節屆期。嚴道範於瑤壇，祝後天之景福。顧惟方外之侶，不忘事上之誠，迺睦忠勤，益用歎獎。故茲示諭，想宜知悉。初冬，卿比平安好？遣書指不多及。大觀元年十月十四日。《茅山志》卷四。

賜劉混康詔

大觀元年十月

朕遠之久，傾想惟勤，喜知道履冲粹。所奏辭免春首赴闕事，朕未諭也。誠欲再見儀刑，款導積闊。而遜避再三，詞情迫切，遽見絕之若是。況仙鶴安流，何勞之有。歲元後別降詔旨，預此及之。未間，保練天和爲祝。來春遣人宣召，毋得推辭阻命。《茅山志》卷四。

賜劉混康詔 大觀元年十月十九日

敕劉混康：累上表事具悉。卿養浩山樊，棲真物外，優游自得，起處甚休。荐覽貢章，深嘉勤至。惟妙談之杳隔，第馳情以瞻思。累頒詔書，來春赴闕。尚遲他託，苦厭塵誼。當抑志而暫枉飛鳧，毋養高以固違朕志。尚體春遇，無忽予言。冬序云初，冲襟善保。乍寒，卿比平安好？遣書指不多及。大觀元年十月十九日。《茅山志》卷四。

賜劉混康詔 大觀元年閏十月二十一日

自別仙風，起處佳否？芝蓋東下，每一念之，未嘗不慨然耳。雲水生涯，逍遙自得，真有出世無窮之樂。極思講妙，決在來春。未間，保籙持教外，善齋是禱。大觀元年閏十月二十一日。《茅山志》卷四。

僧行可賜師號度牒各二道詔 大觀元年閏十月二十一日

六日

明州育王山寺掌管仁宗御容僧行可賜師號、度牒各二道，用為酬獎，或願將師號換紫衣亦聽。《宋會要輯稿》道釋一之三一。

賜劉混康詔 大觀元年十一月六日

敕劉混康：累收來奏，備悉勤恪，不啻與聲欵接也。順履時序，食息何若？來春飛船西上，妙論可期。貴妃所需符子，當為應副。未間，善為輔養。

三茅君聖像畫畢，止伺先生到闕，專得面付。治病佩帶符子，告求數十貼。大觀元年十一月六日。《茅山志》卷四。

賜劉混康詔 大觀元年

敕劉混康：省所奏辭免赴闕事具悉。朕欽奉真元，夙崇高道。眷彼棲真之侶，常形夢寐之思。佇瞻每渴於儀刑，睽闊倏更於歲籥。再款話言，庶資妙理。是用載馳使傳，敦趣造朝。忽露封章，引疾懇避。夫豈不懷，義非可強，當止召命，更伺歲年。尚慎寢餐，以副眷渥。春和，卿比平安好？遣書指不多及。《茅山志》卷三。

賜劉混康詔 大觀元年

敕劉混康：睽異又見畏景，殊積詠思。想惟偃蹇雲山，養高物外，從容於自得之場，健羨無窮。有所諭言，詎可臆口？當伺飄馭西來，面悉至意。彼中有目擊事，毋憚煩碎，並附郵傳以聞，使一方民瘼不壅於上聞，茲所望也。炎歊隆熾，善衛沖和。《茅山志》卷四。

賜劉混康詔 大觀元年

別來一周星律，傾渴話言，未嘗替也。志趣高尚，厭絕囂紛，得以澄神靜慮，為沖漠之游，良多慰浣。愈遠高論，徒深引向。首夏清和，為道保育。月末忽目眚連發，疏以書問。笄師可

〔二〕嘗：原作「當」，據文意改。

令速至。有經數卷，伺筮師到，令附去，皆親書。《茅山志》卷四。

賜劉混康詔

大觀元年

累承所惠符子，不敢自享，人若有疾，必與服之，庶滋先生治病救人之意。諸符子告求數十道，附遞進納。《茅山志》卷四。

賜劉混康詔

大觀元年

敕劉混康：所上表并錄奏，具悉。仍知所拜章詞，消辰已達，得聞筌秘，嘉歎良深！倘非卿迪中觀妙，契道育真，志念蒼黔，誠通淵默者，孰能臻此？欣沃可知。涉此夏秋，益崇慶善。朕萬機之暇，每覽道樞，傾想話言，何啻飢渴。發春匪邈，期必西來，當體至懷，毋執謙避。秋高氣肅，卿比平安好？遣書指不多及。《茅山志》卷四。

賜劉混康詔

大觀元年

所奏增崇三茅徽號，已契勘典禮施行，至宜悉之。春首會面，不可拒命，所期者款密高妙而已。冬候向嚴，倍萬沖攝。符子更求數十貼，即感也。宮門事常在念，豈不懷耳？《茅山志》卷四。

賜劉混康詔

大觀元年

敕劉混康：穎悟真機，昭融至道，每覽奏牘，寔契朕心。欽迺三茅，懇求封冊，緬懷道廡，宜示褒隆。即付敕司，俾加顯命。今令頒錫，至可領也。冬閏紀良，保頤何若？阜流脩阻，

系想徒勤。俯邇春和，切期構止，安然舟御，勿憚一來。密屈迎長，精加澄練。冬寒，卿比平安好？遣書指不多及。《茅山志》卷四。

賜劉混康詔

大觀二年正月

敕劉混康：省所上表，來春赴闕事具悉。卿累造宸廷，遽乞還山，兩歷歲華，每勤馳轡。且聞春初西上，深契予懷。極思談微講妙，預當滌慮齋心以伺耳。申遣使人計治舟御，許從便道飛船安濟，宜速辦裝，慰此翹渴。會晤伊邇，尚宜善衛。已差入內西京左藏庫使〔一〕、殿中省尚輦局典御、勾當龍圖天章寶文顯謨閣黃希叟降敕召卿赴闕〔二〕。春寒，卿比平安好？遣書指不多及。《茅山志》卷四。

賜劉混康詔

大觀二年正月五日

獻歲發春，順履時序，起處安如。陳乞事並依所欲，逐一施行。若自京口而來，極便。思一見之，形於寤寐。伺黃希叟到，毋少稽留，可乘春水，庶無阻滯。有所需闕，一一奏來。區區已具敕書，茲不多述。黃希叟到，便可促行。大觀二年正月五日。《茅山志》卷四。

賜劉混康詔

大觀二年二月十五日

敕劉混康：卿近嬰微恙，已遂痊平。計惟保練有方，無勞

〔一〕左藏庫：原作「在藏庫」，徑改。
〔二〕顯謨：原作「顯模」，徑改。

藥餌。近覽來奏，力疾造朝，足切勤確，不替忠嘉。披閱以還，良深歎獎！希叟到日，便可飛舫。乘此春波，安濟西上，經過郡邑，無爲滯留。佇伺鶴軒，以款清論。暄妍在序，善輔是宜。中春，卿比平安好？遣書指不多及。大觀二年二月十五日。《茅山志》卷四。

賜劉混康詔

春色晴融，仙舟偃息，不妨高養浩然之氣，良自得也。或有所需，可計會希叟。行當會見，預已忻快。未間，尚宜保練爲最。《茅山志》卷四。

賜劉混康詔

敕劉混康：卿持心淵靜，毓德沖和。每造楓宸，居多啓沃。不聞名理，忽復累歲，鄙吝之心生焉。申遣使人，往趣飄馭。宜輟白雲之游，來赴紫宸之會。其諸旨意已具前詔，當體眷想，毋復稽留。今差人內文思使、殿中省尚輦局典御、勾當龍圖天章寶文顯謨閣黃希叟管押舟船，就茅山宣召卿赴闕。故茲示諭，想宜知悉。春暄，卿比平安好？遣書指不多及。《茅山志》卷四。

賜劉混康詔

思渴晤言，何劇如之。以日計程，四月上旬必達闕下。春水安流，想無阻節。途中宜止絕人事，日惟東顧以伺。將欲入汴，宜速奏來。未會間，尚須善護。《茅山志》卷四。

道門試經撥放年額數內女冠增作七十人詔

大觀二年五月二日

道門近添試經撥放年額，數內女冠試經舊額人數甚微，天下之大，只度三十三人，可通舊數增作七十人爲額，內在京畿三十人，諸路四十人，亦仰禮部依道士例均撥。《宋會要輯稿》道釋一之三。

劉混康贈太中大夫誥

大觀二年五月乙卯

朕惟至德之世，無爲而萬物化，淵靜而百姓定。爰率是道，納民泰和。誠意感通，異人沓至。眷遇之禮，曲盡始終。葆真觀妙沖和先生劉混康虛一守真，純白自得。前知休咎，能警群迷；或託呪符，克愈衆疾。雖身棲林谷，而名振京師，朕用嘉歎。召對閒宴，屢聞至論，深契予心。比復造廷，燕居琳館，了然委化，不約而同。靜思所存，宜加憫飾。太中之秩視諫大夫，茲爲異恩，尚期歆享。特贈太中大夫。《茅山志》卷四。

北界歸明僧人支錢詔

大觀三年三月二十八日

每月支錢三貫文。應歸明北僧支錢者並依此，舊多者從多給。《宋會要輯稿》兵一七之七。

禁釋教道場將道教神位相參詔

政和二年正月癸未

釋教修懺水陸及祈禳道場，輒將道教神位相參者，僧尼以違制論，主首知而不舉，與同罪。著爲令。《通鑑長編紀事本末》卷一二七。

徐和常冲虚先生制

政和二年三月二十三日

敕左街道錄觀妙明真虛一大師徐和常：朕體道之妙，修身臨民，廣清淨之化，以收無爲之功。一介之士，道術苟明，必加延禮，將以振高風而激流俗，助予爲治，豈苟然哉！爾心契冲漠，行無淄磷。守靜足以葆真，致虛足以觀妙。物賴善救，人歸誠化。功利所及，不爲無補。美名顯秩，務極褒崇。尚加勤行，以副虛宁。可特授冲虚先生。《宋大詔令集》卷二二三。

上許真君尊號醮告詞

政和二年五月

維政和二年太歲壬辰，五月丁巳朔，十七日癸酉，皇帝佶謹遣入內侍省內殿程奇請道士三七人，於洪州玉隆觀建道場七晝夜，罷散日，設醮一座，三百六十分位，上啓神功妙濟真君：伏以至神無像，雖莫能名，成德在人，姑從所示。式褒顯蹟，肇薦徽稱。冀享褒崇，永綏福地。佶無任誠惶誠恐懇禱之至。謹詞。《玉隆集》卷三四。

御降真君冊詔表文

臣佶祇奉高真，肇揚顯蹟。仰太霄之在望，拔靈宇以申虔。

美利所加，既作黎民之福；純熙來被，更延景歷之昌。臣無任精虔激切之至，謹奉表奏以聞。臣佶誠惶誠恐，稽首頓首謹言。

《玉隆集》卷三四。

御降真君玉冊文

政和二年五月

維政和二年歲次壬辰，五月丁巳朔，十七日癸酉，皇帝再拜言曰：天眷用懋，寵綏四方，爰有至真，克相上帝，烜威赫德，錫羨降康，而名號弗宣，曷彰報典？乃詔有司，考循秘牒，發揮遺懿，垂示無窮。恭惟真君躬握元圖，密庸妙契，繇魏迄晉，嗣休炳靈，賑乏蠲痼，一方攸賴。剪妖馘毒，三氣獲分。肆膺謀姆之符，榮啓都仙之籍。超昇旋極，載祀綿邈，廟像屹崇，風烈如在。矧炎暉之有赫，方皇運之正隆。荐降嘉祥，聿彰幽贊。禴禴響答，民物阜寧。宜極徽稱，以昭嚴奉。謹遣朝奉大夫、充集賢殿修撰、知洪州軍州管幹學事、兼管內勸農使、充江南西路兵馬鈐轄護軍、賜紫金魚袋王勇上尊號曰「神功妙濟真君」。洪惟降鑑，誕受丕章，佑我無疆，保茲景命。俾緝熙於純嘏，用敷錫於群倫。謹言。《玉隆集》卷三四。

封神列真人詔

政和二年五月

洪都福地，紫府列真。既靈異之有聞，豈褒崇之可後？以爾早學至道，嘗悟秘言，道化施行，世稱慈父，功行甫就，飛昇帝鄉。大江之西，尚存故宅，凡禱輒應，吾民是依。錫之新封，用彰厥懿。朕命惟允，其鑑於茲。可特封神列真人。《玉隆集》卷三五。